

تحفة الراغب

في

سيرة جماعة من اعيان اهل بيت الاطياب



مما من الله تعالى به على عبده

محمد ذهني


آل النبي ذريعتي وهم اليه وسيلتي
أرجو بهم اعطى غداً بيدي اليمين صحيفتي
(حضرت شافعي)

رأيت ولائي آل طه فريضة على رغم اهل البعد يورثني القربا
فما طلب المبعوث اجراً على الهدى بتبليغه الامودة في القربا
(حضرت محي الدين)

قسنطنيه

١٣٣٢

شمس مطبعه سي



مطبعة شمسی

باب عالی جاده سنده نومرو — ۴۳



بِسْمِ اللّٰهِ الرَّحْمٰنِ الرَّحِیْمِ

الحمد لله الذى اكرم حبيبه صلى الله عليه وسلم ببردتى الجمال والجلال، وجعله عروس مملكة القدس وسلطان منصة الكمال .
صلى الله عليه وعلى آله الذين اوجب على امته مودتهم ، والزمهم محبتهم . ورضى الله عن اصحابه الذين امر الله الامة باكرامهم والزمهم التمسك بتوقيرهم واحترامهم . بعد ذا :

بوكتاب مصر ك علماء شافعية سندن اولوب مزيد علم وورعى جهتيله عصر نده (شافعى صغير) عنواتى آمش اولان (احمد شهاب الدين بن احمد بن سلامة القليوبى) مرحومك (تحفة الراغب فى سيرة جماعة من اعيان اهل بيت الاطياب) تسميه ايتديكى رساله نك ترجمه سيدر . بونده مؤلف ديار مصر يه ده مقامات و مراقد مباركه لرى معروف اولان متحيزان سادات كرامك سير شريفه لرى على الاختصار جمع و ذكر ايشدر . ترجمه رساله دخى (بغية الطالب فى ترجمة تحفة الراغب) تسميه اولنيدر .

مبدأ تراجم حضرت حسين افندمن اولديغيچون وقعة دلسوزدن بر آز بحث ضرورى دوشمشدر . كرچه امام غزالي حضرت لرى رزء جناب حسيندن وبين الصحابه جريان

ايدن حادثاتدن بحث ايتمك بعض اصحاب علمينه هيچانى مؤدى اوله جنى ايچون واعظلره وغيريلره حرام اولور ديمشدر ولکن اوبختر شمدي خواصه منحصر قالمق شوييه طورسون تاريخ اسلام درسنده مکتبلره کچديکيچون دکل يالکز عوام مسلمينه، نورسيدگان غير مسلمينه بيله خفي قالمه - ديغندن آنلري کتم ايتمه نك شوزمانلرده برمغنى وفائدهسى بو قدر. مؤلف علماء اهل سنتندندر اقوالى اعتقادى کبي بدع اهل اهوادن عاريدر. وقعه جناب حسيني ايراددن مرادى مشاراليه افندمز حضر تلرينك ثبات و متانت و علو همت و منزلتلىرى بيان اولديغنى مقدمه رساله ده ذکر ايتمشدر . کندينک تاريخ وفاتى خلاصه الاثرده مذکور اولديغنه کوره ۱۱۶۹ سنه سى شوانک او اخريدر. احبادن مرحوم برذاتک اثر تشويقي اولان ترجمه بوندن يکرمى سنه اقدم وجوده کلمشدى . او وقتک اصولنجه طبع و نشر ايچون آلمش اولوبده مسوداتيله برابر قالمش اولان رخصتنامه نك تاريخى شودر : فى ۱۸ ربيع الاول سنه ۱۳۱۱ و ۱۱ ايلول سنه ۵۰۹ طبعى و نشرى بوکون مقدر ايمش فسبحان الله العظيم فى ۱ محرم سنه ۱۳۳۱

محمد ذهنى

سیدنا حضرت حسین رضی اللہ
تعالیٰ عنہ

مشارالیہ افندمز (ابو عبداللہ الحسین ابن اشرف النساء
ام الائمة الاصفیاء ، البضعة الطاهرة سیدتنا فاطمة الزهراء درکہ
سید المخلوقین وحبیب رب العالمین اولان پیغمبر من افندمز ک کریمہ
محترمہ لری حضرت فاطمة الزهرا افندمز دن متولد برنور میبندر .
پیغمبر من صلی اللہ تعالیٰ علیہ وسلم افندمز ک دخی اسم ونسب عالی لری
شویله در :

محمد بن عبداللہ بن عبدالمطلب بن ہاشم بن عبد مناف بن
قصی بن کلاب بن مرة بن کعب بن لوی بن غالب بن فہر بن مالک
بن النضر بن کنانہ بن حزیمة بن مدركة بن الیاس بن مضر
بن نزار بن معد بن عدنان .

امام مالک رحمہ اللہ حضرت لری نسب عالی نبوینک آدم
علیہ السلامہ قدر رفع واسنادینی مکروہ عد ایتمشدر . زیرا
آندہ اختلاف کثیر واردر .

پیغمبر من افندمز ک والدہ لری سیدة طاهرہ (آمنہ) بنت وہب
بن عبدمناف بن زہرہ بن کلاب درکہ نسب عالی نبویدہ مذکور اولاندر .

حضرت حسین افدمزك پدرلری : امیر المؤمنین سیدنا علی بن ابی طالب بن عبدالمطلب درکہ نسب عالی نبوی رجالدن اولان عبدالمطلب حضرت تلریدر. بتون اور جالی جناب حق آتامدن تطہیر ایتمش و سجود اصنامدن انلری وقایہ ایلشدر .

نسب کان علیہ من شمس الضحی
نوراً ومن فلق الصباح عموداً

ما فیہ الا سید من سید .

حازالمکارم والتقی والجودا

حضرت حسین (رضی اللہ عنہ) افدمز هجرت سنیہ نک دردنجی سنہ سنده مہد آرای عالم وجود اولمش و ولادت سنیہ لری شعبانک بشندہ شرف وقوع بولمشدر . حضرت فاطمہ الزہراء مشارالیہ افدمزی برادرلری امام حسن افدمزك ولادت لردن الی کیجہ صکرہ حامل اولمشدر . حین تولد لرنده تخنیکنی۔ کہ آغز آچہ تعبیر اولنور۔ بالذات حضرت نبی اکرم مبارک ریق شریف لریلہ اجرا بیور مشلر و قول اقلربنہ اذان شریف او قوم مشلر و حق لرنده دعا ویدنجی کونی نام عالیربنی (حسین) تسمیہ بیور مشلر و عقیقہ قربانی کسمش لردر . حضرت حسین خجسته و فرخنده اولہرق تورہ یوب پک شجیع و مقدم و عالم وزاهد و فصیح و وجیز العبارة بلیغ یتشم مشلر درر . جمیع احوالندہ

جناب حقہ مقبل و متوکل وجد عالیہری حضرت خاتم الانبیاء
 سو کیلی ایدیلر . حضرت ابوہریرہ دن مرویدر کہ اول سلطان
 کزین و سید الثقلین حضرت تلی مسجد نبویلرندہ او طوروب :
 کوچیجک زده ؟ کبی بر تعیر ایلہ حضرت حسینی آرامشیر .
 همان حضرت حسین یوریہ رک کلوب حضرت سلطان الانبیانک
 قوجاقلرینہ دوشہ رک یارمقلرینی حیۃ سعادتہ صوقشیر .
 سلطان الانبیاء اقدمز حضرت تلی دخی حضرت حسینک
 آغزلرینی آچوب کندی فم سعادتلرینہ آلہرق : « یارب ! بن بونی
 سویورم سن دہ سو . آنی سونی دخی سو . » بیورمشلردر .
 عصر سعادتدن صکرہ حضرت عبداللہ بن عمر (رضی اللہ عنہما)
 کعبہ مکرمہ نک ظلمندہ او طورولر ایکن حضرت حسین اقدمزی
 کلیور کوردکلرندہ : « بو کونکی کون اهل ارضک اهل سمایہ
 اک سو کیلیسی بودر . « دیو بیورمشدر . حضرت حسین
 (رضی اللہ عنہ) بر کون کعبہ معظمہ رکنتی در آغوش ایدرک
 شو مناجاتی ایتمشلردر : « الہی ! بنی متنعم قیلدک ، متشکر
 بولمدک . مبتلی قیلدک ، صابر بولمدک . نہ ترک شکرم ایلہ سلب
 نعمت ایتدک ، نہ دہ ترک صبرم ایلہ ادامہ شدت ایلدک . الہی !
 کریمدن فضل و کرمدن بشقہ برشی اولماز . »
 مدینہ منورہ دہ بدرلری حضرت علی (کرم اللہ وجہہ)
 کوفہ جہتنہ چیقنجه بہ قدر انلرک خدمتلرندہ بولنوب اورایہ

برابر کیتمشلر وانلرک بتون حروب ووقائعهنده بولتمشلردر .
شهادتلرینه قدر یانلرندن آیرلمیوب پدرلرینک وقوع شهادتلرندن
صکره برادرلری حضرت حسن افندمزایله برابر اولمشلر وانلرک
استقاله لری (خلافتدن کف ید بیورملری) اوزرینه مدینه
منوره یه عودت بیوروب التمش تاریخنه قدر مدینه طاهره ده
قالمشلردر .

امام سیوطی دیرکه آلتمش تاریخنده اهل شام یزیده بیعت
ایلدیلر . بعده یزید کندینه اخذ بیعت ایچون مدینه منوره یه
آدم کوندردی . حضرت حسین و عبدالله بن الزبیر و عبدالله
بن عمر رضوان الله تعالی علیهم آکا بیعتدن امتناع ایدوب ابن
عمر حضرتلری ناس آنک بیعتنه اتفاق ایتمدکجه بن بیعت ایتم
دیدی . حضرت حسین و عبدالله بن الزبیر حضرتلری بیعت
ایتممکی غزم ایدرک همان اوکیجه مکه مکر مه یه متوجهاً مدینه دن
چیقدیلر . ابن الزبیر نه یزیده بیعت ایتدی نه ده کندیسنه بیعتنه
کیمسه بی دعوت ایلدی . حضرت حسین افندمز ایسه یزیدک
پدری طرفندن ولی عهد اولسی اوزرینه اهل کوفه کندیلرینه مکتوب
یازوب طرفلرینه چیقوب کلرینی استدعا ایدر اولدینی حالده
اجابت وموافق بیورمزلر ایدی . وقتا که یزیده بیعت اولندی
کندیلری گاه بولندقلری حال اوزره قالمق وگاه کوفه لیلر جاننه
کیتمک عزمنده بولنور اولدیلر . ابن الزبیر حضرتلری کوفه لیلر

طرفه کیتملرینی رأی و تنسیب ایدر و حضرت ابن عباس صاقین کیتمه دیر ایدی . عبدالله بن عمر حضرت تلمری دخی حضرت حسینیه بورادن چیقیمیکنز دیو بیان رأی ایلر ایدی . کندیلری جانب عراقه کیتمکی تصمیم ایتدیلر . ابن عباس حضرت تلمری : والله بن ظن ایدرم که سن حضرت عثمان کبی نسا و بناتک آره سنده قتل اولنه جقسین . دیدیسه ده حضرت حسین قبول بیورمدقلری جهته حضرت ابن عباس حجازی ابن الزبیره بر اقمش اولیورسکز دیدی . اهل عراق حضرت حسینیه آدملر و مکتوبلر ارسالیله کندیلرینی طرفلرینه دعوت ایتدیلر . اول حضرت عشر ذی الحججه ده مکدن عراقه متوجهاً چیقیدیلر . برابرلرنده ارکک و قادین و چولق چوجق کندی اهل بیتلرندن بر طاقم ذوات وار ایدی . یزید کندینک عراق والیسی بولنان عبیداه بن زیاده حضرت حسین ایله مقاتله ایتسنی تحریراً امر ایتمش اولمغله ابن زیاد اول حضرته قارشو عمر و بن سعد قومانداسنده درت بیک عسکر چیقاردی . اهل کوفه اولجه پدرلرینه یایدقلری کبی اول حضرته دخی ترک نصرت ایدوب سمتته وارمدیلر . حضرت حسین کندیلرینی عسکر واسلحه ایله محاط کورنجه دونوب کیدهیم یعنی حجازه عودت ایدهیم دیدیلر ایسه ده انلر قبول ایتیبوب قتال ایتدیلر و اول حضرتی و نور چشم امتی قتل و شهید ایلدیلر . رأس شریفی آلوب برلکن ایچنه قویبه رق

ابن زیادك اوكنه كوتوردیلر . الله انك قاتلنه و برابرجه ابن زیاده و همده یزیده لعنت ایتسون . قتل و شهادتی کربلا دینیلان موضعده وقوع بولدی . هنکامه قتلنده قصد طویل وانك ذکر و ایرادینه قب غیر متحملدر . (انلله و انالیه راجعون) .

اول حضرت ایله مقاتله ایدنلرک اکثری کندیلرینه بیعت ایدن دعوتنامه یازانلر ایدی . دینیلیورکه حضرت کزین یعنی جناب امام حسین انلرک بهمه حال قتال ایده جکلیخی نیقن بیوردقده کندی اصحاب و اهل یتی ایچنده خطبه یه قیام ایدوب جناب حقه حمد و ثنادن صکره بیوردیلرکه : « ایش کوردیککز حاله کلدی . دنیا تغیر ایدوب زدن رو کردان اولدی . انك خیری کیروله دی . غایت کمتر دو کنتیمی قالمدی .

کورمیورمیسکزکه حق معمول به دکلددر . باطل دخی متناهی عنه دکلددر . مؤمن اولان لقاء الله رغبت ایتسون . شبهه یوق که بن موتی آنجق سعادت کوریورم . ظالملر ایله برابر یشامغی انجق جرم کوریورم بویله بیوروب قتاله قویلدیلر . قتل اولننجیه قدر قتال ایتدیلر . رضی الله عنه و ارضاه .

شهادتی التمش برسنه سی عاشوراسنده محرمک اونجی کوننده ارض عراقدن اولوب حله ایله کوفه میاننده واقع (کربلاء) نام موضعده وقوعه کلدی کندیلریله برابر اوکونجی کون اهل بیتلرندن یکریمی اوچ کشی قتل و شهید ایدلدی . ابن الانباری

روایت ایدرکه امیرالمؤمنین علی کرم الله وجهه حضرت تلرینک کریمه لری سیده زینب حضرت لری برادر لری جناب حسینک شهادتی اوزرینه چادر دن باشلرینی چیقهره رق و رفع صوت ایدرک شویله بیورمشلردر ، (اوج بیت) ترجمه سی :

«حضرت پیغمبر سزه : بنم اهل و خاندانمه بندن صکره نه یایدیکز ؟ کیمنی اسیر ایتدیکز . کیمنی قانلره بو یایدیکز . دییه جک اولورسه نه جواب ویره جکسکز ! سزه ایتدیکم نصیح و خیر خواهلغک عوضی بودکل ایدی که بنم ذوی الارحام واقاربم حقنده کملکله بکا خلف اوله سکز .»

راویلرک روایتلرینه کوره عبدالملک بن عمر اللیثی کوفه ده کی قصر الامارینی کوستره رک دیمشکه : بن بو کوشکده حضرت حسین بن عینک رأس شریفی عبدالله بن زیادک اوکنده برقالقان اوزرنده کوردم . بعده عیدالله بن زیادک باشنی مختار بن ابی عیدالثقفینک اوکنده کوردم . بعده مختارالثقفینک باشنی ده مصعب بن الزبیرک اوکنده کوردم ، بعده مصعبک باشنی دخی عبدالملکک حضورنده کوردم . بونی بن عبدالملکه حکایه ایتدیکمده عبدالملک الاموی تشأم ایدوب اوقصری ترک ایلدی .

امام ترمذینک تخریجنه کوره ام المؤمنین حضرت ام سامه رضی الله عنها وقعه کربلا کیجه سی رسول اکرمی رؤیاده

مکدر برحاله کوروب سؤال ایتدکارنده شهادت حضرت
حسینی خبر ویردکلرینی سویله مشدر . امام بهقینک دلائله
تخریجنه کوره ابن عباس رضی الله عنه حضرتلری دخی بر
نصف نهارده حضرت رسول اکرمی عالم منامده الارنده بر
شیشه وایچنده دم اولدینی حاله کوروب سؤال ایتمشلر .
جواب اوله رق اول سلطان کزین دخی : حسینک واصحابنک
دمیدر . بوکون بن انی یردن طوبیلامقده یم . بیورمشلر .
اوکون حساب ایدلمش تام حضرت حسینک شهید اولدینی کون
ایمش .

ابو نعیمک دخی دلائله ام سلمه حضرتلرندن تخریجاً
روایت ایتدیکنه کوره مشارالیه حضرتلری : بن طائفة جنک
حضرت حسینه بکا ونوحه ایدر اولدکلرینی ایشیتدم . دیمشلردر .
امام ثعلب دخی امالیسنده ابو جناب الکلبیدن روایة ذکر
ایتشدرکه ابو جناب : « کربلایه واروب اشراف عربدن
برینه طائفة جنک نوحه و فریادلرینه دائر بنم ایشتمش اولدیغم
شیئی بکا بیلدر . دیدیکمه جواب اوله رق : سن کیمسه یه
ملاقی اولماز سین الاکه اوسکا بو حالی ایشتدیکنی اخبار ایدر . دیمکله :
سن ایشتدیکی بکا سویله . دیدم . او دخی انلر شو و نظمی
سویلیورلر ایدی ایشتم دیمشدر . ترجمه سی : حضرت رسول
انک جبین لطیفی مسح بیورمش اولمغله وجهنده لمعان واردر .

ابوینی قبیله قریشك اشراقنددر جد امجدلری دخی اجدادك
خیرلیسیدر .

سید جلیل شهاب الدین احمد بن الرفاعی که دیار مصریه جه شیخ-
الشیوخ وبتون ممالک اسلامیه جه عالم صاحب رسوخدر حضرت
امام حسینک مرتبه سنده شوقولی نه کوزل سویله مشدر . ترجمه سی :
یا امیمه ! موت احمر [*] ایله وفات ایدن اویاض یوزلی (نورانی
لقا) به سما وثری آغلادی . صوسزاوله رق شهید سیف اولوب
کیتدی . کندینک دست یینی ایسه دکزله آقیدر ایدی .

ابن الاعرج الحسینی بحر الانساب دیو معروف اولان
کتابنده دیمشدر که امام حسین محرمک اونجی جمعه ایرتسی
وعلی قول بازار ایرتسی کونی زوال وقتی سنه ۶۱ ده
کربلاده شهید ایدلدی . اوزرینه کلان عسکرک امیری عمرو
بن سعد ایدی . عبیدالله بن زیاد حانبدن امیر الحیش
ایدی . عبیدالله بن زیاد خبیثی ایسه یزیدک عراق والیسی
ایدی . مأموریتی دخی حضرت امام حسیندن یا بیعت المق

(*) عربده اولوم اوج رنگ ایله آ کیلور : بیاض ، قرمز ،
سیاه بونلردن موت ابیض که بیاض اولومدر . خستهک ایله اولان موتدر .
موت احمر که قرمز اولومدر قتل صورتیله اولان موتدر . موت
اسود که سیاه اولومدر . طاعون ایله اولان موتدر . هرهانکی صورتله
اولورسه اولسون وفات ایدن تکریمه لاحتدر .

ویا خود مشارالهی قتل ایتک ایدی . حضرت حسین علیه السلام اوکونکی کون جمیع اصحاب ورفقاسی یتمش ایکی نفس اولوب انلردن کیمی عبدالمطلب اولادی وکیمی سائر سلاله دن ایدی . او توز ایکیسی آتلی وقرقی پیاده ایدی . جمله سی مقتول و شهید اولدی لر . رضی الله عنهم وارضاهم . بعده هپ بردن حضرت حسین اوزربنه حمله ایتدی لر . تیراندازلره رمی قومانداسی ویرلدی . حضرت مشارالهی انلر اوقه طوتدی لر اول حضرت او قلر ایچنده قالدی . وجود مبارکلرنده اوق و مزراق و قلیج و طاش اثری اولمق اوزره او چیوز یکر می طقوز جریحه حاصل اولدی . نهایت الامر اقدام و قتاله طاقتلری قالیوب بیتاب اولدی لر . سنان بن انس الخزومی اسمنده برملعون مزراق ایله اوروب اول وجود مبارکی یره دوشوردی . خولی بن یزید الاصبجی دینیلان خیت رأس مبارکی کوده دن کسوب آلمق اوزره همان سکرندی ایسه ده کندیسنه برر عشه کلدی . شمر بن ذی الجوشن دینیلان ملعون : الله بازوکی طاغتسون ؛ نه وار که دتره یورسین ؛ دیه رک حیوانندن اینزب اول حضرتی قوچ بوغازلار کبی بوغازلادی . اهل بیتدن کندیسینه برابر قتل و شهید ایدی لانلرک عددی اون سکزدر امیر المؤمنین حضرت علینک اولادندن : عباس و عبدالله و جعفر و عثمان و ابوبکر و محمد ، و حضرت حسینک اولادندن :

علی و عبد اللہ، و حضرت حسنک اولادندن: القاسم و ابو بکر و عبد اللہ،
و حضرت عبد اللہ بن جعفر الطیار اولادندن: محمد و عون، و عقیل
ابن ابی طالب اولادندن: عبد اللہ و جعفر و عقیل و عبد الرحمن و محمد
بن سعید بن عقیل بن ابی طالب. رضوان اللہ تعالیٰ علیہم اجمعین .
ابن زیاد ملعون رأس شریفی و امام شہید اقدمزک برابرندہ بولنان
اہل بیتدن امام زین العابدین و خالہ سی سیدہ زینب حضرت تلرخنی یزیدہ
کوندردی. یزید ملعون انلری موقع سبی و استرقاقدہ طونوب
حقلرندہ حرمتسز لکی تمامیلہ اجر ایتدی. رأس شریفی کندی النده
بولنان بردکنک ایله دو کر و دور تشر اولدی. و فوق الحد اظہار سرور
و شادمانی ایتدی. اخیراً مسلمینک او حالہ ممنون اولد قلرخنی کورہ رک
اظہار ندامت ایدوب خاندان حضرت حسینک مدینہ منورہ یہ
اعادہ سنی امر ایلدی . دینیلیور کہ یزید رأس شریف جناب
حسینک بلده بلده طولاشدیرلسنی امر ایتمش اولمغله اورأس
مبارک طولاشہرق عسقلانہ واردی . اورانک امیری راس
شریفی اوراہہ دفن ایتدی . مؤخرأ طائفہ افرنجک اورابی
استیلالرندہ فاطمیون وزراسندن اولان (صالح طلائع) اموال
کثیرہ ویرہ رک اورأس مبارکی انلردن قورتاردی و عسکر عظیم
و خلق کثیر ایله بر قاج قوناق یردن آنی استقبالہ چیقوب
وصول و ملاقاتندہ رأس شریفی باشنک اوزرینہ آلدی و آنی

آبنوسدن معمول بر کرسیده یشیل ایپکدن بر کیسه ایچنه قویدی . علی قول التوندن بر صندوچه یابدیریلوب آلتنه مسک ایله طیب دوشه نلدی . ذکر اولنان وزیر صالح آنک اولدینی محله مصرده الان معروف بولنان مشهد حسینی بی بنا ایلدی . رأس شریفک محل دفننده اختلاف اولنوب کیمی مدینه منوره یه کوندریله رک بالتکفین بقیع شریفه والده لری حضرت زهرانک یاننه (*) و برادر لری امام حسنک یاننه دفن اولندی . و بر طاقی : کربلا یه اعاده اولنوب جثه شریفه ایله برابر دفن ایلدی . دیمشکر ایسه ده اکا بر اهل اللهک قولی رأس شریفک حالا مصرجه معروف و معمور بولنان محله اولسنده وکل یوم قطبک آنی کلوب اوراده زیارت ایلمکده بولنسنده در . اهل کشفک چوغی دخی بو قولی تأیید ایلمکده . در لر . شهره یوق که مشهد قاهریده اولان فیض روحانی صاحب ذوق و وجدانه کوره خفی قالمیه جق صورته آشکاردر . شریف ابن الاعرج بحر انساب کتابنده دیر که امام حسینک الی اولاد مکرمی وارددر : (۱) علی اکبر حضرت تلری بونک والده سی ایران ملیکی یزدجردک کریمه سی (شهربانو) در . (۲) علی اصغر حضرت تلری . پدریله برابر شهید اولمشدر . والده سی (لیلی بنت

(*) بوسوز حضرت فاطمه نک بقیه مدفونه اولملری حقه کی روایته مبنیدر . مع هذا که مشارالیه افندمک قرب روضه اولدقلری شهردر .

ابی مره بن عروه مسعود الثقفیه (۳) جعفر حضر تلی .
والدهسی قضاعیه در . پدر لربنک حیاتنده وفات ایتمش لردر .
ذربتلی یوقدر . (۴) عبدالله حضر تلی . صغیر اولدقلری
حالدہ پدر لریله برابر شهید اولمش لردر پدر لربنک قوجاغنده
ایکن کندی لربینه براوق اصابت ایتمشدر (۵) سکینه حضر تلی
کریمه لربدر والدهسی (رباب بنت امری القیس بن عدی) در .
شهید معصوم عبدالله حضر تلی دنخی والدهسی بو خاتون
ایدی . (۶) فاطمه حضر تلی . والدهسی (ام اسحق بنت
طلحة بن عبدالله) در ایدنالله ببرکتهم . انتهى .



(سیده زینب بنت الامام علی کرم الله وجهه)

حضرت علینک کریمهسی بولنان مشارالیهاست زینب
حضر تلی بنک والده لری حضرت فاطمة الزهراء افندمزدن
روایتلی وارددر . کندی لری پدر لری حضرت مرتضایه پک
سوکلی ایدیلر . عمزاده لری حضرت عبدالله الجواد بن
جعفر الطیاره زوجه اولمش لرب و صلب جناب عبداللهدن جعفر
وعون الاکبر وام کلثوم وعلی نام اولاد مبارکی طوغر مشلردر .
امام سیوطی رساله زینبیه سنده دیمشدر که حضرت زینب صلب

عبداللهدن علی و عون الاکبر و عباس و محمد و ام کلثوم نام اولادی
طوغر مشدر . ذریتی الآن کثرتله موجوددر . انلر دخی اهل
بیت نبویدندر . اوت حضرت حسن و حضرت حسین اولادی
ایچون مزیت خصوصیه واردر که او مزیتده سائر لری انلره
مقیس و موازی اوله ماز . او مزیت شو حدیث شریف ایله ظاهر .
درکه پیغمبر من صلی الله تعالی علیه وسلم افند من حضرت لری :
« هر انا او غلرینک بر عصبه سی واردر بوندن فاطمه نك ایکی
او غلری مستنادر که انلرک و لیس و عصبه سی بنم . » بیور مشدر
روایت حدیثده « لکل بنی ام عصبه الا بنی فاطمة انا ولیهما
و عصبتهما » بدلنده « کل بنی ام ینتمون الی عصبه الا ولد فاطمة
فانا ولیهم و عصبتهم » دخی وارد اولمشدر . صاحبه الترجه ست
زینب حضرت لری قناطر السباع ده مدفونه اولاندر . اهل قلوبدن
وارباب کشف و مشاهده دن بر طاقم ذوات بویله جه تصحیح
ایتمشدر . عنی الخواص حضرت لری او سواقنک باشنه کلدکجه
ایاق قابدرینی چیقارر و حضرت زینبک مسجدینی کچنجه قدر
یالین آیاق بولنوب مر قدمبار کلرینک قارشو سنده طورر و کندی
مغفرتی ایچون حضرت زینبه متوسلاً دعا بیورر ایدی . بز
دخی مشایخ و اساتید کرام می حضرت زینبک زیارتیه تبرک
اوزره بولوب حضرت مشارالیهانک قبر منیر لرینی زیارت ایتدکلری
وقت حاجت لرنده جناب حقه انکله توسل ایدر لر و باذن الله

تعالی حاجتگیری ده حاصل اولور کوردک . بونی بن کنندی
نفسمده دخی تجربه ایتدم . هیچ بر اندوهلی و کدرلی زمانم
اولمدی که انک کشایشی نتیله حضرت زینبی زیارت ایده یمده
اک سریع بر صورتده او غم بندن زائل اولمش اولسون .
استادمن الشیخ احمد المنصوری الاحمدی (رحمة الله) نک
مجموعه سنده ایکی بیت کوردم که حضرت استاد او بیتلری بر
حاجت ایچون نظم وانشاد ایدوب او حاجتک باذن الله حاصل
اولدیغنی ذکر ایتشدردر . او بیتلر شونلردر :

الهی بزینب بنت البتول سليلة خیر الوجود الرسول
اغثنی وفرج کروبى فقد سالت بزینب ارجو القبول

یعنی : یا الهی ! خیرالموجودات اولان حضرت رسولک
سلاله سی و جناب فاطمة البتولک کریمه سی بولنان حضرت زینب
حرمتنه بکا یاردم ایله . و بندن هموم و اکداری کشف و ازاله
ایله که بن حضرت زینبه متوسلاً سکا دعا ایتدیکم جهته قبولی
امید ایدرم .

تاریخ و فاتلرینه واقف اولمامشمدردر . سلاله شریفه سی
(زینیون) دیو معروفدر . علم انساب دانشوری اولان مولانا
عییدی که صاحب اخبار مدینه طاهره در زینیونک اذکار علیه لرینی

بر تفصیل ذکر ایتم شد در. علی ساکن المدینہ و ذریبہ و اصحابہ افضل
الصلاة والسلام .



(السيدة الطاهرة رقية اخت الامام الحسين بنت الامام علي)
(کرم الله وجهه)

حضرت حسینک همشیره سی و حضرت علینک کریمه سی
بولنان مشار الیها ست رقیه حضرت لری قبل البلوغ
وفات ایدوب دار الخلیفه یه قریب بولان مشهد مبارکه دفن
اولنمشلردر . برابر لرنده اهل بیتدن دها بر طاقم ذوات واردر .
رضی الله عنهم . و او مشهد مبارک شجره الدر مسجدينک
قارشوسنده در . استاذ من مولانا شیخ الاسلام برهان الدین
علی الجلی بکا بیان و ابنا ایتم شد در که کندیلرینی بر هم و الم احاطه
ایتمکله حضرت رسول اکرم صلی الله تعالی علیه وسلم افند مزه
بر چوق صلوات شریفه او قوم مشلر . بر قاج کون کچمیوب سیده رقیه
حضرت لرینی کور مشلر . « یا علی ! بزى محلمزده زیارت ایله .
ایش حاصلدر . « بیور ملریله برابر شم دیکی مشهد معروف لرینی
تعریف ایتمش اولملریله حضرت استاذ کیدوب زیارت ایتمش
ویک آز زمان ایچنده او کدری جناب حق کندیسنندن